

I-VCap rancang tawar empat produk baru

Pelaburan peringkat kedua MyETF turut dilaksanakan

Oleh Zainab Mohd Yatim
zmy@bharian.com.my

I-VCAP Management Sdn Bhd (i-VCap), syarikat pengurusan dana milik Valuecap Sdn Bhd yang baru mendapat lesen sebagai syarikat pengurusan dana Islam, akan menawarkan antara tiga hingga empat produk baru secara berperingkat pada separuh kedua tahun ini.

Ketua Eksekutifnya, Zainal Izlan Zainal Abidin, berkata i-VCap yang memulakan operasi pada 2007 menerusi lesen penyedia perkhidmatan pengurusan dana am, juga akan menawarkan pelaburan tambahan peringkat kedua dana MyETF Dow Jones Islamic Market Malaysia Titans 25 (MyETF).

MyETF yang juga satu-satunya dana pengurusan syarikat itu ketika ini, adalah Dana Dagangan Bursa berlandaskan Syariah yang pertama di Asia dan disenaraikan di Bursa Malaysia pada Januari 2008 dengan saiz dana bernilai AS\$140 juta.

"Kami tidak melihat kepada berapa banyak saiz dana yang akan diuruskan, namun program pembesaran itu akan meningkatkan saiz dana yang diuruskan syarikat dengan ketara, berbanding AS\$140 juta ketika ini," katanya ketika ditemui di Kuala Lumpur, baru-baru ini.

Beliau menjelaskan, pihak-



nya sedang mengkaji strategi terbaik sebelum menawarkan produk baru berkenaan yang akan merangkumi pelbagai kelas aset, seperti pasaran wang, ekuiti dan gabungan kelas aset dengan bon.

"Kami tidak akan memperkenalkan produk berasaskan bon semata-mata, kerana kami mahukan produk yang boleh diurusniagakan secara aktif dan bukannya dana yang terperap menunggu tempoh matang," katanya.

Zainal Izlan juga tidak menolak kemungkinan, ada antara produk pelaburan Islam yang akan diperkenalkan itu berpotensi untuk disenaraikan sama ada di bursa tempatan atau luar negara, serta ditawarkan dalam mata wang selain daripada ringgit, sama

“ Kami tidak akan memperkenalkan produk berasaskan bon semata-mata, kerana kami mahukan produk yang boleh diurusniagakan secara aktif ”

**Zainal Izlan
Zainal Abidin**
Ketua Eksekutif i-VCap

ada dolar Amerika Syarikat atau Eropah.

"Langkah yang akan kami ambil seterusnya selari dengan hasrat kami untuk menjadi syarikat pelaburan Islam yang utama di Asia.

"Lesen pengurusan dana Islam yang kami peroleh pertengahan Mac lalu, membolehkan kami bersaing dengan sembilan lagi pemegang lesen baru yang semuanya diberikan kepada pelabur asing untuk mengendalikan operasi perbankan, pelaburan dan takaful di negara ini," katanya.

Mengenai sasaran pelanggan, beliau menganggarkan nisbah pecahan pelanggan hampir sama dengan yang sedia ada yang mana pelanggan bagi MyETF ketika ini hampir 80 peratus adalah insti-

tusi, dan bakinya individu dan daripada jumlah pelabur berkenaan, 10 peratus adalah pelabur asing.

Ditanya Mengenai sama ada sesuai bagi syarikat memperkenalkan produk baru ketika keadaan ekonomi global kurang memberangsangkan, menggalakkan, Zainal Izlan berkata, dari perspektif pelabur dana, tempoh ini adalah yang paling sesuai kerana pelabur bersiap memasuki pasaran dan mencari produk pelaburan menarik pada harga lebih rendah, sebelum momentum kenaikan berlaku.

"Namun, dari segi pemasaran, tempoh yang sukar ini akan menjadi cabaran besar bagi mereka yang terbabit untuk meyakinkan pelabur secara keseluruhan," katanya sambil menambah i-VCap tidak akan terburu-buru memperkenalkan produk baru dan melihat reaksi sambutan pelabur yang lebih mantap.

Bagi menyokong operasi syarikat, selaras hasrat pembesaran dan perluasan produk yang akan dilaksanakan, beliau berkata satu lagi syarikat pelaburan dana akan dilantik, sebagai tambahan kepada tiga yang sedia ada.

"Kami juga akan menambah bilangan kakitangan kepada 16 orang berbanding 12 orang ketika ini," katanya.